

# Grischun 2022 è preparà bain sin las ristgas

## Identifgà schanzas e ristgas da gieus olimpics

■ (cp) In studi scientific da l'interpresa da perscrutaziun Rütter+Partner ha evaluà las schanzas e ristgas relevantas da Grischun 2022. Schanzas sa mussan en la valur agiuntada e la creaziun da plazzas da lavur, ristgas pudessan nascher sch'il concept du-raivel vegniss modifitgà suenter in'attribuziun dals gieus. L'Uniu Grischun 2022 ha gia resguardà las ristgas potenzialas en sias examinaziuns e prepara la candidatura sin l'utilisaziun da sias schanzas pli optimala pussaivla.

Tgi che vul nizzegiar optimalmain las schanzas d'in project grond e dumagnar las ristgas sto enconuscher quellas ordavant. La segunda part dal studi scientific da Grischun 2022 davart ils effects sin l'economia publica s'occupa perquai da las schanzas e ristgas dal project. Cun la publicaziun dal studi mussa l'Uniu Grischun 2022 ch'ella tracta da bell'entschatta era tematicas criticas da ses project a moda averta e transparenta e ch'ella agescha da maniera proactiva per dumagnar eventualas ristgas.

L'october 2012 aveva l'emprima part dal studi independent da Rütter+Partner mussà che la realisaziun da gieus olimpics d'enviern en il Grischun pudessia generar ina valur agiuntada da radund 1,8 milliardas francs. Cun in volumen da lavur da bundant 15 000 umens per onn e da circa in milliun pernottaziuns supplementaras è il project per gieus olimpics d'enviern ina gronda schanza commerciala per il chantun Grischun.

### Garantir l'utilisaziun da las schanzas

Identifgar las schanzas è la basa per profitar sistematicain da quellas. Alura ston ils organisaturs, ma er ils uffizis statals ed ils responsabels dal turissem e dad autras branschas garantir ch'ins possia era nizzegiar las schanzas identifgadas.

Ultra da quai vul l'Uniu Grischun 2022 dentant era chapir e far palais co ch'i stat cun las ristgas. I vegn numnadain adina puspè pretendì che gieus olimpics d'enviern chaschunian surtut gronds custs e cuntengian ristgas incal-

culablas. L'interpresa da perscrutaziun Rütter+Partner ha perquai sclerì en in vast studi nua che las grondas ristgas per Grischun 2022 sa zuppan e co ch'ins sto fruntar quellas.

Ils auturs dal studi *Jürg Stettler* e *Heinz Rütter* han examinà cun in team da scenziads tut ils secturs relevants per ina realisaziun da gieus olimpics: Els han analisà las ristgas economicas, ecologicas e socialas ed evaluà quellas a basa d'expertschas.

### Criteria per minimisar cun success eventualas ristgas

La pli gronda ristga potenziala vesan ils auturs en adattaziuns interpretadas suenter l'attribuziun dals gieus l'onn 2015. Il studi renviescha er a la dumonda davart la persistenza. Ultra da las ristgas revelescha il studi er ils criteris impurtants per minimisar cun success quellas ristgas:

L'integraziun a temp da la tematica da persistenza en la preparaziun.

La prontezza da renunziar en cas da basegn ad ina candidatura sche las valurs centralas da quella na pon betg vegnir resguardadas.

L'observaziun impegnativa da contracts stipulads e naginas modificaziuns posteriuras dal concept en disfavur da las valurs centralas suenter in'approvaziun tras l'IOC il 2015.

«Ils contracts cun l'IOC èn impegnativs per omaduas partidas e suttastattan al dretg svizzer», intuna *Matthias Remund*, directur da l'Uffizi federal da sport e vicepresidente da Grischun 2022. «Modificaziuns suenter la stipulaziun dals contracts necessiteschan il consentiment dad omaduas partidas.» Era puncto persistenza è Grischun 2022 bain preparà: «Cun ils Dialogs PII e la Charta PII impegnativa disponin nus dad instruments che permettan d'ademplir las

empermischuns. A medem temp vegn realisà in management da ristgas modern ed efficaci.»

### «Fatg ils pensums»

Per Grischun 2022 na resultan naginas surpraisas dal studi: Las ristgas èn enconuschantas e vegnan adressadas da l'organisaziun dal project: «Cun ils resultats preschentads oz disponin nus dals instruments per orientar optimalmain la candidatura e la realisaziun dals gieus olimpics ad effects economic positivs per la populaziun», declera *Gian Gilli*, directur da Grischun 2022. «Il studi fa palais las pli grondas ristgas dal project e cumprova che nus avain fatg noss pensums. Els Grischuns pon dir cun in bun sentiment «gea» a Grischun 2022

**Renviements als resultats:**  
Il rapport davart il studi ès disponibel sut [www.gr2022.ch/downloads](http://www.gr2022.ch/downloads)



Ier han ils experts Christian Gartmann, Jürg Stettler e Heinz Rütter (da san.) preschentà las schanzas e las ristgas da gieus olimpics.